



## Sumáriu mensal Novembru 2020

### **Pontu de vista JSMP kona-ba modalidade sira kazamentu nian tuir Lei númeru 10/2011 Kódigu Sivíl**

Iha 26 Novembru 2020, Sra. Ana Paula Marçal, Diretora Ezekutiva JSMP, hateten katak provizaun legál ne'ebé di'ak maka aseguira no proteje sidadaun hotu-hotu nia direitu inklui liberdade atu hili no fiar relijiaun tuir ema ida-idak nia hakarak, tanba direitu hirak ne'e prevee no garantia ona iha ita nia konstituisaun RDTL iha artigu 12 ne'ebé ko'alia kona-ba Estadu no relijiaun sira.

Aleinde ne'e atu haforsa direitu no liberdade ba relijiaun ne'e mós define iha Konvensaun Internasionál ba Direitu Sivíl no Política (ICCPR), ne'ebé Estadu Timor-Leste liuhusi Parlamentu Nasionál ratifika ona iha 2003 ho Rezolusaun Nú. 3/2003 no públika ona iha Jornal da Repúblika iha 23 Maiu 2013.

Liután Diretora ne'e esplika katak maski direitu sira ne'e garantidu ona iha instrumentu legál sira balun, maibé iha Lei Númeru 10/2011 Kódigu Sivíl iha livru haat ne'ebé regula kona-ba modalidade sira kazamentu nian sei nafatin iha diskriminasaun ba relijiaun sira ne'ebé la'os katóliku.

Preokupasaun ne'e JSMP hato'o ona ba iha parte relevante sira hanesan Ministériu Justisa, Parlamentu nasional liuliu komisaun A no mós Grupo Muller Parlamentár Timor Leste (GMPTL), liuhusi enkontru sira no mós JSMP ninia paraser, JSMP hein katak ho hanoin sira ne'e instituisaun relevante sira sei tetu no halo mudansa ka halo alterasaun ba iha artigu ne'e, atu nune'e parte balun la sente katak iha diskriminasaun.

Relasiona ho asuntu ne'e, antes ne'e JSMP mós halo ona entrevista ho lider relijiozu sira husi relijiaun Muslimanu no Protestante hodi hetan mós hanoin ruma liga ho JSMP ninia preokupasaun sira relasiona ho Kódigu Sivíl. Iha intrevista ne'e, parte sira ne'e hato'o mós sira ninia preokupasaun kona-ba Títulu II Kapitúlu I husi Kodigu Sivíl kona-ba modalidade sira kazamentu nian liuliu iha artigu 1475, 1476, 1477, 1479. Sira konsidera katak artigu sira ne'e diskrimina kazamentu relijiaun sira seluk ne'ebé la'os katoliku,

Preokupasaun sira ne'e mosu bainhira sira lori dokumentu ofisiál husi sira nia relijiaun atu ba trata sertidaun RDTL no sertidaun kazamentu RDTL nian iha notariadu no funsionáriu notariadu sira la autoriza sira atu rejistu no funsionáriu sira mós esplika katak tuir lei la autoriza relijiaun seluk hodi bele hetan sertidaun RDTL no sertidaun kazamentu RDTL.

JSMP nia haree katak iha Kódigu Sivíl ne'e Estadu Timor-Leste rekoñese no valoriza de'it kazamentu katóliku no tradisionál monogamiku ka kazamentu barlakeadu.

Preokupasaun husi Lider relijiozu sira bele haree iha JSMP nia website [www.jsmp.tl](http://www.jsmp.tl) iha pajina publikasaun submisaun iha tinan 2019 ka bele asesu iha link ne'e [https://jsmp.tl/wp-content/uploads/Pareser-ICCPRKazamentuSivilartigu1475FINAL\\_TETUM.pdf](https://jsmp.tl/wp-content/uploads/Pareser-ICCPRKazamentuSivilartigu1475FINAL_TETUM.pdf)

Hatan ba preokupasaun sira ne'e iha enkontru Konsellu Ministru horseik, iha 25 Novembru 2020, Ministru Justisa apresenta ona ba Konsellu Ministru opsaun polítika legislativa sira kona-ba projetu Kódigu Rejistu Sivíl. Opsaun polítika – lejislativu sira ne'ebé apresenta ona hodi permite rejistu kazamentu ba forma hotu-hotu kazamentu nian ne'ebé lei rekoñese, maka iha presupostu legál sira hodi prodús efeito sivíl sira, no mós hodi hakbesik justisa ba sidadaun, fó enkuadramentu legál ba utilizaun suporta informátiku sira no kompleta lakuna sira seluk serbisu rejistu sivíl nian.

JSMP mós hakarak agradese ba Ministru Justisa, tanba apresenta ona iha Konsellu Ministru, nune'e hatan ona ba preokupasaun husi parte balun nian liuliu ba maluk sira ne'ebé la'os relijiaun katóliku. JSMP hein katak iha tempu besik proposta ne'e bele aprova iha Konsellu Ministru no bele lori ona ba Parlamentu Nasionál hodi diskute.

Atu hetan informasaun liutan bele kontaktu:

Ana Paula Mar çal  
Diretora Ezekutiva JSMP  
Email: [ana@jsmp.tl](mailto:ana@jsmp.tl)  
Telefone: 3323883 | 77040735  
Website: <https://jsmp.tl/>